

Võrokeelitside koorilaule ja -säädide konkurss

Aolugu

31. mail 2008 oll Võrol Kubija laululaval edimäne võrokeeline laulupido Uma Pido, kon oll liss hulgale päältkajile koon 2400 lauljat. Pido kõrraldus ja repertuaari vällävaliminõ lätsi häste kõrda. Plaani omma säändse, et edespiten nakas Uma Pido olõma egä katõ aasta takast, ütškõrd Võro ja tõnkõrd Põlva maakunnan. Edimädse pido ettevalmistusõ näüdässi, et ku muidu om umakeelist repertuaari ja laulutekste küländ, sis puudu tule koorilaulõst ja kuurõlõ tettü laulusäädist. Edimädse Uma Pido jaos oll vajja eräle koorisäädit telli ja tuukõrd panti repertuaar kokko säändse mooduga, et laulutekste autori olnu peri Vanalt Võromaalt ja et laulutekste olnu egäst Vana Võromaa kihlkunnast. Pido kavan olli regilaulu, rahvaligu laulu, klassikalise koorilaulu ja kuurõlõ säetü poplailu. Uma Pido tunnuslause om "Ku keskkotus kõva, sõs ladva' laulva". Tuu tähendas, et ku võrokõsõ ja võrokeelitse kultuuri juurõ omma kimmäle maa seen ja tüvi nõsõs taiva poolõ, sis ladõv hällüs tuulõ käen ja laul. Nüüd tõsõ Uma Pido repertuaari tävvendüses tahetas tetä vallalinõ konkurss.

Konkursi tingimuse

Konkursilõ tahetas saia peris vahtsit koorilaulõ ja ka joba olõman laulõlõ tettü koorisäädit. Oodõtas laulõ ja säädit nii *a capella* ku saatõga kõigilõ kuurõlõ: ütiskoori, segakoori, naisikoori, miihikoori (kõigil 3-4 hellü), latsikoori (2-3 hellü), poiskõisikoori ja mudilaskoori (mõlõmbal 1-2 hellü). Kõik laulu piät olõma võro keelen. Ku koorilaul om tettü rahvalaulu põhja pääle, sis piät tekst ja viis olõma ütest Vana Võromaa kihlkunnast (Karula, Hargla, Kanepi, Urvastõ, Vahtsõliina, Rõugõ, Põlva, Rāpinä). Tõisist keelist tõlgit asju konkursilõ ei taheta. Nõvvu ja soovituusi tekste kottalõ saa Võro Instituudist (wi@wi.werro.ee, tel 78 28750). Egä võistlustüü man piät olõma märgüsõna. Manu või panda (seosama märgüsõna all) eräle teedüse luu kottalõ, näütüses kuimuudu seo lugu sündü, autori tahtmisõ saatõmuusiga man jne. Teedüs viie ja teksti autori kottalõ (nimi, inemisekuud, aadrõss, telehvon) piät olõma manu pant kinnilidsen ümbrigun seosama märgüsõnaga. Võistlusõlõ saadõt tüü ei või olla innembi vällä antu egä kongi päältkajile ette lauldu vai mängitü. Vällä antu vai ette mängitü või olla õnne tekst, määndsele viis om luudu vais sis laul, määndsele om tettü vahtsõnõ sääde. Varramba vällä ant teksti vai muusiga autori nimi piät olõma võistlustüü pääl är märgit. Tõid hindas kooni 5 inemisega žürii. Parõmbidõ tõie autori saava stipendiumi, neo antas kätte konkursi lõpukontsõrdil 2009. aasta keväjä. Stipendiumidõ suurusõ otsustas žürii, avvuhinnarahha kokko om 35 000 kruuni, rahha omma andnu Eesti Kultuurkapitali rahvakultuuri sihtkapital ja Võro ja Põlva ekspertgrupi. Ku avvuhinna saa lugu, määndse tekst om innõ vällä andmada vai sis eräle seo konkursi jaos tettü, sis antas stipendium ka teksti autorilõ. Žüriil om õigus jätta avvuhinna vällä andmada, ku konkursilõ saadõt tüü omma kehväkese vai ei kõlba võrokõisi laulupido repertuaari. Avvuhinna saanu tõid ja tõisi konkursilõ saadetu tõid pruugitas edespiten umakeelitside laulupidodõ repertuaarin.

Võistlustüü 6 eksemplarilõ tulõ saata Võro Selts VKKF aadrõssi pääle (Võru, Tartu tn 48, 65609 Võru) kõgõ hildamba 31. jaanuaris 2009.

Täpsämb teedüs: Võro Selts VKKF, Tartu tn 48, 65609 Võru, tel 78 28750, 78 28752, projektijuht Triinu Ojar, tel 533 22 153 triinu.ojar@wi.werro.ee